

MALAYSIA
DEWAN RAKYAT
ATURAN URUSAN MESYUARAT

NASKAH SAHIH/BAHASA MALAYSIA

<http://www.parlimen.gov.my>

HARI ISNIN, 13 MAC 2023, PUKUL 10.00 PAGI

Bil. 18

PERTANYAAN-PERTANYAAN BAGI JAWAB LISAN

1. PR-1521-L18264
Tuan Manndzri bin Nasib [Tenggara] minta **MENTERI PEMBANGUNAN USAHAWAN DAN KOPERASI** menyatakan jaminan pihak Kerajaan untuk terus membantu golongan usahawan khususnya usahawan belia dalam memastikan kelangsungan perniagaan mereka terutama sekali dalam menghadapi krisis ekonomi yang dijangka berlaku pada tahun ini.
2. PR-1521-L19132
Dato' Seri Dr. Shahidan bin Kasim [Arau] minta **MENTERI EKONOMI** menyatakan adakah Kerajaan akan menyejajarkan pelaksanaan projek Chuping Valley Industrial Area (CVIA) dan Pelabuhan Darat Perlis (PIP) yang telah lama dirancang kerana projek terbabit dijangka mampu menjadi pemangkin untuk meningkatkan kesejahteraan rakyat terutamanya dari segi sosioekonomi khususnya bagi negeri Perlis dan juga negara keseluruhannya.
3. PR-1521-L18397
Tuan Lee Chean Chung [Petaling Jaya] minta **MENTERI PERDAGANGAN ANTARABANGSA DAN INDUSTRI** menyatakan mengapa Proton masih diberikan pelbagai layanan istimewa memandangkan ia bukan lagi kereta nasional, malah miliknya juga hanya 51% dikuasai oleh warga Malaysia. Adakah layanan istimewa ini bakal dimansuhkan.
4. PR-1521-L19285
Dato' Sri Saifuddin Abdullah [Indera Mahkota] minta **MENTERI PENDIDIKAN TINGGI** menyatakan apakah langkah-langkah yang akan dilaksanakan untuk merealisasikan reformasi pendidikan di kalangan institut pengajian tinggi di negara ini.

5. PR-1521-L19411
Dato' Sri Ismail Sabri bin Yaakob [Bera] minta **PERDANA MENTERI** menyatakan apakah langkah serta bantuan yang disediakan oleh Kerajaan bagi menampung peningkatan mendadak kos untuk mengerjakan ibadah haji dan umrah yang mampu memberi kesan secara terus terhadap mereka yang beragama Islam.
6. PR-1521-L18333
Tuan Haji Muhammad Islahuddin bin Abas [Mersing] minta **MENTERI PERTAHANAN** menyatakan sejauh mana pelaksanaan skim Bantuan Sara Hidup (BSH) kepada veteran-veteran ATM yang tidak berpencen khususnya kategori B40.
7. PR-1521-L18308
Tuan Lim Guan Eng [Bagan] minta **MENTERI KOMUNIKASI DAN DIGITAL** menyatakan kos dan kualiti perkhidmatan 5G yang ditawarkan oleh syarikat kepada pengguna dan apakah usaha untuk mengurangkannya lagi sehingga ia adalah terendah di ASEAN. Nyatakan tempoh masa liputan 5G di seluruh negara termasuk Sabah dan Sarawak boleh dicapai .
8. PR-1521-L18935
Ir. Ts. Haji Khairil Nizam bin Khirudin [Jerantut] minta **MENTERI PERDAGANGAN DALAM NEGERI DAN KOS SARA HIDUP** menyatakan pelan tindakan serta strategi daripada Kementerian bagi memastikan kos bahan mentah sentiasa di dalam keupayaan rakyat, agar kos sara hidup rakyat Malaysia sentiasa terjaga.
9. PR-1521-L18292
Tuan Haji Aminolhuda bin Hassan [Sri Gading] minta **MENTERI PERDAGANGAN ANTARABANGSA DAN INDUSTRI** menyatakan apakah usaha-usaha Kerajaan bagi memastikan syarikat-syarikat besar tidak beralih arah dari Malaysia ke negara lain.
10. PR-1521-L18679
Tuan Afnan Hamimi bin Taib Azamuddin [Alor Setar] minta **MENTERI KOMUNIKASI DAN DIGITAL** menyatakan apakah pendirian terhadap kebebasan bersuara dalam berpolitik dalam kalangan generasi muda di dalam medium media sosial.

11. PR-1521-L18516
Dato' Seri Haji Aminuddin bin Harun [Port Dickson] minta **MENTERI PERTAHANAN** menyatakan mengenai waktu lawatan Muzium Tentera Darat yang beroperasi mengikut waktu pejabat. Adakah cadangan daripada Kementerian untuk menambah hari dan waktu lawatan untuk memberi peluang lebih masa kepada pelancong datang melawat.
12. PR-1521-L18090
Dato' Indera Dr. Suhaili bin Abdul Rahman [Labuan] minta **PERDANA MENTERI** menyatakan proses pemulihan kesejahteraan 434,197 ketua isi rumah (KIR) yang direkodkan dalam kelompok miskin dan miskin tegar menerusi Data Kemiskinan Nasional (eKasih), Unit Penyelarasan Pelaksanaan, Jabatan Perdana Menteri dan adakah Kerajaan Perpaduan bersedia mengubah semula definisi kadar garis kemiskinan mengikut tahap ekonomi semasa.
13. PR-1521-L17994
Tuan Tan Kok Wai [Cheras] minta **MENTERI KOMUNIKASI DAN DIGITAL** menyatakan apakah yang telah berlaku kepada cadangan Majlis Media Malaysia yang telah diluluskan penubuhannya oleh Kabinet pada 6 Disember 2019 dan perkembangan penggubalan rang undang-undang bagi penubuhan majlis itu.
14. PR-1521-L18806
Tuan Syed Saddiq bin Syed Abdul Rahman [Muar] minta **PERDANA MENTERI** menyatakan dalam usaha Kerajaan untuk mengurangkan perbelanjaan dan menjimatkan wang rakyat adakah Kerajaan akan menilai semua pertindihan wang persaraan penjawat awam terutama sekali bagi ahli-ahli politik yang menerima pencen berlipat ganda apabila memegang beberapa jawatan seperti Ahli Dewan Rakyat, Ahli Dewan Undangan Negeri dan Speaker.
15. PR-1521-L18162
Tuan M. Kulasegaran [Ipoh Barat] minta **PERDANA MENTERI** menyatakan :
 - (a) jumlah individu yang telah memohon pengampunan; dan
 - (b) nyatakan masa paling awal pengampunan telah diberikan kepada banduan yang sedang dipenjarakan.
16. PR-1521-L18654
Puan Hajah Salamiah binti Mohd Nor [Temerloh] minta **MENTERI EKONOMI** menyatakan :
 - (a) statistik terkini kemiskinan mengikut kaum, agama dan negeri ; dan

- (b) apakah usaha Kerajaan untuk mengurangkan kadar kemiskinan ini.

17. PR-1521-L18708

Tuan Roy Angau anak Gingkoi [Lubok Antu] minta **MENTERI PERDAGANGAN DALAM NEGERI DAN KOS SARA HIDUP** menyatakan pencapaian dan kejayaan penerima dana harta intelek dan adakah Kementerian bersedia menambah baik dana ini bagi memastikan lebih ramai peniaga mendaftar hak cipta pada masa hadapan.

18. PR-1521-L19359

Datuk Wira Hajah Mas Ermieyati binti Samsudin [Masjid Tanah] minta **MENTERI KOMUNIKASI DAN DIGITAL** menyatakan apakah hala tuju internet luar bandar dan apakah solusi sementara bagi menangani isu capaian internet yang cukup kritikal di luar bandar ini dengan menggunakan banyak teknologi satelit *Very Small Aperture Terminal* (VSAT) membantu atasi masalah ini.

19. PR-1521-L18501

Dato' Haji Shamshulkahar bin Mohd Deli [Jempol] minta **PERDANA MENTERI** menyatakan apakah Kerajaan boleh mempertimbangkan pindaan Akta Tanah (Kawasan Penempatan Berkelompok), 1960 supaya mengiktiraf status rumah kedua yang dibina di atas tapak asal rumah Tanah Rancangan Felda bagi tujuan pemasangan bekalan air dan elektrik di rumah kedua tersebut.

20. PR-1521-L18180

Datuk Muslimin bin Yahaya [Sungai Besar] minta **MENTERI PEMBANGUNAN USAHAWAN DAN KOPERASI** menyatakan berapa ramai usahawan-usahawan yang telah gulung tikar dari waktu pandemik COVID-19 sehingga kini dan apakah usaha Kementerian untuk membantu usahawan ini dan sehingga kini sudah berapa ramai yang telah bangkit memulakan perniagaan semula.

21. PR-1521-L18466

Datuk Seri M. Saravanan [Tapah] minta **PERDANA MENTERI** menyatakan berapa jumlah pegawai dan kakitangan kaum India yang berkhidmat dalam sektor awam pada masa ini dan berapa peratus pegawai dan kakitangan kaum India dalam sektor awam dibandingkan dengan jumlah keseluruhan kakitangan sektor awam.

22. PR-1521-L19153

Dato' Haji Mohd Suhaimi bin Abdullah [Langkawi] minta **MENTERI PERTAHANAN** menyatakan hala tuju Kementerian Pertahanan bagi program PERHEBAT untuk bakal pesara ATM dan adakah Kementerian berpandangan program ini masih relevan atau sebaliknya.

23. PR-1521-L18200

Tuan Khoo Poay Tiong [Kota Melaka] minta **PERDANA MENTERI** menyatakan :

- (a) pandangan Suruhanjaya Pilihan Raya (SPR) mengenai pemberian wang oleh calon ataupun orang awam kepada pengundi semasa pilihan raya, sama ada untuk tujuan 'sedekah', tambang pengangkutan atau lain-lain ; dan
- (b) adakah Kerajaan Perpaduan akan menerbitkan secara awam laporan oleh Jawatankuasa Khas Pembaikan Sistem dan Undang-undang Pilihan Raya (ERC) yang telah diserahkan sejak Ogos 2020.

24. PR-1521-L19289

Tan Sri Dato' Haji Mahiaddin bin Haji Mohd. Yassin [Pagoh] minta **MENTERI EKONOMI** menyatakan pendirian Kerajaan mengenai Dasar Wawasan Kemakmuran Bersama 2030 (WKB2030) seperti yang telah digariskan di bawah Rancangan Malaysia Ke-12 (RMK-12).

25. PR-1521-L18941

Tuan Jamaludin bin Yahya [Pasir Salak] minta **PERDANA MENTERI** menyatakan :

- (a) adakah gagasan Malaysia Madani telah menggantikan Wawasan Kemakmuran Bersama (WKB 2030); dan
- (b) di manakah kedudukan dasar dan agenda Bumiputera dalam Malaysia Madani dan jika ada, apakah pelan tindakan menyeluruh yang akan diambil oleh Kerajaan PH-BN dalam memacu agenda Bumiputera dan memantau pelaksanaannya.

26. PR-1521-L18816

Tuan Haji Kamal bin Ashaari [Kuala Krau] minta **PERDANA MENTERI** menyatakan pendirian Kerajaan mengenai kebenaran pembinaan rumah generasi kedua di atas tanah lot generasi pertama yang tiada jawapan mutlak yang diberikan oleh Kerajaan mengenai hal ini.

27. PR-1521-L19241

Dato' Khilir bin Mohd Nor [Ketereh] minta **PERDANA MENTERI** menyatakan di era Kerajaan PH-BN ini, apakah perancangan dan bentuk peruntukan yang akan diberikan Kerajaan di kawasan-kawasan Ahli Parlimen pembangkang dalam memastikan rakyat yang membayar cukai kepada Kerajaan terus mendapat fasiliti dan dibantu secara adil dan menyeluruh serta pembangunan infrastruktur dan kemudahan asas dapat dibangunkan terutama di Parlimen Pembangkang.

28. PR-1521-L18042

Tuan Fong Kui Lun [Bukit Bintang] minta **PERDANA MENTERI** menyatakan usaha yang akan diperbuat untuk memperkukuh pembentukan Kerajaan Perpaduan seperti yang dihasratkan oleh Kebawah DYMM Yang di-Pertuan Agong memandangkan terdapat kelemahan yang boleh meruntuhkannya.

29. PR-1521-L19225

Tuan Rushdan bin Rusmi [Padang Besar] minta **PERDANA MENTERI** menyatakan apakah program kesedaran bencana alam dan intervensi yang telah diambil.

30. PR-1521-L18224

Tuan Pang Hok Liong [Labis] minta **PERDANA MENTERI** menyatakan baru-baru ini terdapat kebocoran dokumen penghakiman oleh pihak yang tidak bertanggungjawab bertujuan untuk memburukkan nama hakim-hakim yang terlibat dalam kes perbicaraan mantan ahli Parlimen Pekan dan isterinya. Apakah langkah efektif segera perlu diambil oleh pihak berkuasa sebelum institusi kehakiman dimusnahkan oleh pihak yang tidak bertanggungjawab.

31. PR-1521-L19213

Tuan Abdul Latiff bin Abdul Rahman [Kuala Krai] minta **MENTERI EKONOMI** menyatakan inisiatif Kerajaan dalam membantu pembangunan infrastruktur dan penyaluran dana pembangunan untuk negeri-negeri Pantai Timur bagi mengurangkan jurang pembangunan antara wilayah.

32. PR-1521-L18097

Dato' Sri Dr. Wee Jeck Seng [Tanjung Piai] minta **MENTERI KOMUNIKASI DAN DIGITAL** menyatakan apakah tindakan Kementerian bagi menyekat akses tawaran sindiket jenayah penipuan tawaran pekerjaan di luar negara.

33. PR-1521-L18829

Datuk Seri Panglima Bung Moktar bin Radin [Kinabatangan] minta **MENTERI EKONOMI** menyatakan apakah perancangan dan usaha Kerajaan dalam memastikan kestabilan ekonomi negara berada dalam keadaan yang baik dan kuasa beli rakyat dapat ditingkatkan secara menyeluruh.

34. PR-1521-L18752

Tuan Hassan bin Saad [Baling] minta **MENTERI KOMUNIKASI DAN DIGITAL** menyatakan langkah untuk menaik taraf pelan jalur lebar di kawasan-kawasan luar bandar bagi memudahkan akses dalam talian.

35. PR-1521-L17951

Datuk Seri Panglima Dr. Jeffrey Gapari Kitingan [Keningau] minta **PERDANA MENTERI** menyatakan rancangan 2 tahun akan datang oleh Kerajaan dan Petronas untuk memupuk dan membina syarikat dan bakat Sabah dalam sektor hiliran eksplorasi dan pengeluaran minyak dan gas sebab sejak Kerajaan dan Petronas telah mengambil alih sumber minyak dan gas semenjak 1976 dan mungkin meraih bertrilion ringgit akan tetapi telah gagal membangunkan apa-apa bakat atau syarikat di Sabah di sektor hiliran eksplorasi dan pengeluaran minyak dan gas walaupun Sabah adalah negeri pengeluar minyak mentah yang terbesar di Malaysia.

36. PR-1521-L18538

Dato' Indera Mohd Shahar bin Abdullah [Paya Besar] minta **MENTERI PERDAGANGAN ANTARABANGSA DAN INDUSTRI** menyatakan apakah langkah-langkah Kerajaan untuk menggalakkan penggunaan kenderaan sifar karbon memandangkan terdapat sebilangan besar negara lain bergiat aktif untuk mengarusperdanakan penggunaan kenderaan ini.

37. PR-1521-L19112

Kapten Azahari bin Hasan [Padang Rengas] minta **PERDANA MENTERI** menyatakan adakah Kerajaan akan mendedahkan laporan Jawatankuasa Reformasi Institusi yang ditubuhkan pada tahun 2018 yang lalu.

38. PR-1521-L19161

Datuk Seri Dr. Haji Dzulkefly bin Ahmad [Kuala Selangor] minta **PERDANA MENTERI** menyatakan sejauh manakah siasatan tentang dakwaan salah guna kuasa dalam perolehan pelbagai kontrak melibatkan berbilion ringgit, semasa negara dalam PKP yang panjang dalam era PM-8 mempunyai asas dan bukti yang kukuh (*prima facie evidences*) untuk didakwa seterusnya.

39. PR-1521-L18120
Dato' Sri Dr. Haji Ismail bin Haji Abd. Muttalib [Maran] minta **PERDANA MENTERI** menyatakan adalah amat baik Kerajaan berusaha mengambil langkah-langkah penjimatan. Namun, saya mohon penjelasan berapa kos yang ditanggung oleh Kerajaan di atas pertukaran beberapa Kementerian dan nama Kementerian dan apakah cadangan pertukaran ini juga merugikan Kerajaan.
40. PR-1521-L18698
Tuan Haji Bakri bin Jamaluddin [Tangga Batu] minta **MENTERI PERTAHANAN** menyatakan apakah langkah yang diambil bagi menyelesaikan masalah dan keluhan bekas anggota Angkatan Tentera Malaysia yang mana bayaran pencen yang mereka terima tidak setimpal dengan kadar inflasi dan kenaikan kos sara hidup yang tinggi pada hari ini.
41. PR-1521-L19435
Dr. Richard Rapu @ Aman anak Begri [Betong] minta **MENTERI KOMUNIKASI DAN DIGITAL** menyatakan apakah status terkini pembinaan infrastruktur telekomunikasi dan kemudahan jalur lebar dan status aspirasi nasional untuk mencapai 100% liputan 4G di Sarawak.
42. PR-1521-L19363
Tan Sri Haji Abdul Hadi bin Awang [Marang] minta **PERDANA MENTERI** menyatakan bagaimanakah kaedah Dana Pembangunan Kawasan Pilihan Raya (CDF) akan diagihkan kepada wakil rakyat Parlimen dan bilakah dana tersebut akan disalurkan.
43. PR-1521-L19340
Dr. Radzi Jidin [Putrajaya] minta **PERDANA MENTERI** menyatakan bilangan kuarters Kerajaan di Putrajaya yang tidak boleh diduduki akibat tidak diselenggara serta perancangan Kerajaan untuk membaik pulih kuarters tersebut supaya boleh diduduki oleh penjawat awam yang bekerja di Putrajaya.
44. PR-1521-L18282
Dato' Seri Amirudin bin Shari [Gombak] minta **PERDANA MENTERI** menyatakan kesediaan Kerajaan untuk menubuhkan Jawatankuasa Federalisme baharu bagi mengkaji semula kerja sama Persekutuan-Negeri agar Kerajaan-kerajaan negeri diberi peranan dalam bidang pengangkutan, kesihatan serta pencukaian.

45. PR-1521-L18880

Tuan Ahmad Fadhli bin Shaari [Pasir Mas] minta **PERDANA MENTERI** menyatakan komitmen Kerajaan Pusat dalam melakukan sebarang bayaran berkaitan dengan royalti petroleum kepada Kerajaan Negeri Kelantan yang sudah lama tertangguh.

46. PR-1521-L18064

Puan Wong Shu Qi [Kluang] minta **PERDANA MENTERI** menyatakan sama ada Kerajaan akan meminda seksyen 13 (1) (b) Akta Kesalahan Pilihan Raya 1954 supaya warganegara berumur 18 ke atas boleh dilantik sebagai ejen pilihan raya, ejen tempat mengundi atau ejen mengira.

47. PR-1521-L18007

Tuan Sanisvara Nethaji Rayer A/L Rajaji [Jelutong] minta **PERDANA MENTERI** menyatakan sekiranya apa-apa audit forensik akan dilakukan terhadap dana Mitra yang telah diperuntukkan oleh Kerajaan terdahulu untuk mengetahui dan mengesahkan sekiranya terdapat apa-apa penyelewengan dalam pelaksanaan dan pengagihan dana Mitra tersebut.

48. PR-1521-L18859

Dr. Ahmad Fakhruddin bin Fakhrurazi [Kuala Kedah] minta **PERDANA MENTERI** menyatakan apakah tindakan kesedaran dan penguatkuasaan telah diambil untuk membanteraskan gejala LGBT.

49. PR-1521-L18976

Datuk Seri Panglima Madius Tangau [Tuaran] minta **PERDANA MENTERI** menyatakan apakah *timeline* pelaksanaan sepenuhnya Perjanjian Malaysia 1963 sepertimana yang telah ditawarkan oleh parti-parti yang membentuk Kerajaan Perpaduan.

50. PR-1521-L18930

Tuan Zulkifli bin Ismail [Jasin] minta **PERDANA MENTERI** menyatakan apakah perancangan dan hala tuju Yayasan Pembangunan Ekonomi Islam Malaysia (YaPEIM) dalam membangun ekonomi umat Islam khususnya dalam suasana tekanan ekonomi pada hari ini.

51. PR-1521-L19119

Dato' Seri Hamzah bin Zainudin [Larut] minta **MENTERI PERDAGANGAN DALAM NEGERI DAN KOS SARA HIDUP** menyatakan apakah tindakan yang diambil oleh Kerajaan untuk menangani isu monopoli dalam pasaran seperti mana yang dibangkitkan oleh YAB. Tambun berhubung isu BERNAS.

52. PR-1521-L18261

Datuk Seri Johari bin Abdul Ghani [Titiwangsa] minta **PERDANA MENTERI** menyatakan :

- (a) status penjualan tanah Pasar Datuk Keramat kepada syarikat Sinotech Properties Development Sdn. Bhd. dan berapakah harga jualannya; dan
- (b) adakah syarikat ini telah membayar sepenuhnya harga jualan tersebut dan jika belum, adakah Kerajaan akan menarik balik penjualan tersebut.

53. PR-1521-L18583

Datuk Seri Haji Jalaluddin bin Haji Alias [Jelebu] minta **PERDANA MENTERI** menyatakan bagaimanakah bentuk pengurusan terhadap Wilayah Persekutuan Kuala Lumpur, Putrajaya dan Labuan selepas Kementerian Wilayah Persekutuan dimansuhkan.

54. PR-1521-L18074

Dato' Sri Ikmal Hisham bin Abdul Aziz [Tanah Merah] minta **PERDANA MENTERI** menyatakan sepanjang tahun lalu berapa ramaikah menjadi mangsa penipuan *Macau Scam* dan *Love Scam* dan jumlah kerugian dialami.

ATURAN URUSAN MESYUARAT DAN USUL-USUL

1. **Pertimbangan ke atas Rang Undang-undang Perbekalan 2023 (D.R.2/2023) dan Usul Anggaran Perbelanjaan Pembangunan 2023 seperti berikut :-**

“Bahawa Dewan ini, menurut subseksyen 4(3) Akta Kumpulan Wang Pembangunan 1966 [Akta 406], membuat ketetapan bahawa suatu jumlah wang sebanyak tidak lebih dari sembilan puluh sembilan bilion ringgit (RM99,000,000,000) dibelanjakan daripada Kumpulan Wang Pembangunan bagi tahun 2023, dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2023, yang dibentangkan sebagai Kertas Perintah 19 Tahun 2023, adalah diuntukkan di bawah Maksud-maksud yang berkenaan jumlah-jumlah yang bersetentangan dengan butiran-butiran itu di ruangan enam dan tujuh senarai tersebut, dan bahawa Usul yang telah diluluskan oleh Dewan ini pada 20 Disember 2022 mengenai perbelanjaan yang dibelanjakan daripada Kumpulan Wang Pembangunan bagi tahun kewangan 2023 adalah dibatalkan dan hendaklah disahkan.”

Dalam Jawatankuasa Sebuah-buah Majlis (9 Mac 2023)

- | | | | |
|----|----------------|--|-------------------------------|
| 2. | (D.R 1/2023) | Rang Undang-Undang Pencetakan Teks Al-Qur'an (Pindaan) 2023. | Bacaan Kali Yang Kedua |
|----|----------------|--|-------------------------------|

[Menteri Dalam Negeri]

3. **Menteri Kewangan** akan mencadangkan :-

“Bahawa Dewan ini, mengikut peruntukan perenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan) membuat pelaburan dengan menukar baki pinjaman Kerajaan Malaysia sebanyak RM165,282,814.00 kepada UDA Holding Berhad (UDA), sebuah syarikat dimiliki sepenuhnya oleh Menteri Kewangan (Diperbadankan) kepada ekuti (modal saham) bersamaan Seratus Enam Puluh Lima Juta Dua Ratus Lapan Puluh Dua Ribu Lapan Ratus Empat Belas (165,282,814) unit saham biasa pada nilai RM1 bagi satu unit saham.”

4. PR-1521-U(27)231

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia - Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia - Thailand adalah sepanjang kira-kira 656 km

namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak Kerajaan memandang serius perkara ini dengan menyegerakan pembangunan tembok sempadan Malaysia - Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia - Thailand agar benar-benar berkesan menjamin keselamatan perbatasan negara."

[Menteri Dalam Negeri]

5. PR-1521-U(27)232

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan bahan makanan mentah seperti ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan bahan mentah tempatan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bahan makanan mentah. Kerajaan tidak seharusnya melepaskan tanggungjawab menjaga keterjaminan bekalan bahan mentah makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

[Menteri Pertanian dan Keterjaminan Makanan]

6. PR-1521-U(27)233

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018 - 2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

[Menteri Pembangunan Kerajaan Tempatan]

7. PR-1521-U(27)234

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan kepada enam negeri kurang membangun, iaitu Kedah, Kelantan, Perlis, Sabah, Sarawak dan Terengganu seperti yang direncanakan di dalam Pelan Rancangan Malaysia Ke-12 (RMK-12) dapat dilaksanakan secepat mungkin. Berdasarkan pelan RMK-12 tersebut, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Ini akan mempercepatkan penyediaan infrastruktur dan kemudahan asas serta menjana lebih banyak peluang ekonomi di negeri kurang membangun dan mengurangkan jurang pembangunan."

[Menteri Ekonomi]

8. PR-1521-U(27)235

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat bencana alam seperti banjir dan musim tengkujuh. Kerosakan tanaman dan kematian ternakan sering kali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

[Menteri Pertanian dan Keterjaminan Makanan]

9. PR-1521-U(27)236

Dato' Seri Dr. Shahidan bin Kasim [Arau] akan mencadangkan :

Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan Negara dan memerlukan input dari pelbagai agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40. "

[Perdana Menteri]

10. PR-1521-U(27)237

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiap siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

[Perdana Menteri]

11. PR-1521-U(27)238

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan menyemak semula garis panduan Suruhanjaya Komunikasi Multimedia Malaysia (SKMM) mengenai isi kandungan media sosial yang sensitif serta tidak sesuai dengan agama Islam dan budaya tempatan seperti kandungan yang *pro-LGBT* dan *pro-liberalisme*. Misalnya, SKMM baru-baru ini telah bekerjasama dengan Polis Diraja Malaysia (PDRM) untuk memantau penyebaran klip-klip video sensitif yang berbaur provokasi dengan niat mencetuskan ketidakharmonian, kebencian dan prejudis. Oleh hal demikian, Kerajaan digesa supaya melakukan tindakan yang sama bagi menangani penularan isi kandungan *pro-LGBT* dan *pro-liberalisme* di media sosial. Tindakan ini adalah penting untuk memastikan martabat Islam sebagai agama rasmi negara terpelihara dan budaya tempatan dihormati. "

[Menteri Komunikasi dan Digital]

12. PR-1521-U(27)239

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

[Menteri Pendidikan]

13. PR-1521-U(27)240

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan mencukupi serta membolehkan penyelidikan yang agresif dibuat bagi menghasilkan benih padi baru. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia, Filipina dan Myanmar yang mempunyai tanaman dan baka padi yang berdaya komersial tinggi."

[Menteri Pertanian dan Keterjaminan Makanan]

14. PR-1521-U(27)241

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan menyediakan pelan tindakan yang komprehensif untuk menangani kadar pengangguran semasa yang dijangka meningkat terutamanya di kalangan graduan universiti, penduduk luar bandar dan golongan miskin bandar. Pelan tindakan ini amat diperlukan memandangkan keadaan ekonomi global juga bakal meruncing pada tahun 2023 dan kadar pelaburan asing di Malaysia akan terjejas. Dengan situasi ekonomi terkini, lambakan penganggur akan menyebabkan peningkatan jumlah golongan B40 dan B20 akibat peningkatan kos sara hidup."

[Perdana Menteri]

15. PR-1521-U(27)242

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya meneruskan usaha untuk memberi bantuan semula kepada pesawah menerusi Bajet 2023. Dalam ucapan Bajet 2023 yang lepas, Kerajaan mengumumkan bantuan sebanyak RM200 sebulan bagi tempoh tiga bulan kepada 240 ribu penerima yang layak. Anggaran keseluruhan perbelanjaan bantuan tersebut adalah lebih kurang RM228 juta. Justeru itu, Kerajaan digesa agar mempercepat saluran bantuan tersebut kepada pesawah yang memerlukan bagi menyokong pengorbanan mereka sebagai tonggak utama dalam menghasilkan makanan ruji utama rakyat Malaysia iaitu beras. Kebanyakan petani di utara Semenanjung Malaysia mempunyai kawasan sawah padi yang luas serta subur yang juga sesuai ditanam pelbagai jenis tanaman seperti kelapa sawit. Walau bagaimanapun, para pesawah ini masih meneruskan tanaman padi bagi menjamin kelangsungan makanan ruji utama negara. Oleh hal demikian, Kerajaan diharapkan dapat menghargai pengorbanan para pesawah ini."

[Menteri Pertanian dan Keterjaminan Makanan]

16. PR-1521-U(27)243

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

[Menteri Sumber Asli, Alam Sekitar dan Perubahan Iklim]

17. PR-1521-U(27)244

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh hal yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

[Menteri Kewangan]

18. PR-1521-U(27)245

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan."

Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidak langsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

[Menteri Dalam Negeri]

19. PR-1521-U(27)225

Datuk Seri Ir. Dr. Wee Ka Siong [Ayer Hitam] akan mencadangkan :

"Pindaan terhadap Akta Suruhanjaya Pelantikan Kehakiman (JAC) 2009, seiring dengan cadangan serta titah Majlis Raja – Raja Melayu, demi memastikan pelantikan lima daripada sembilan ahli JAC tidak lagi dilakukan oleh Perdana Menteri. Bergerak ke hadapan, adalah wajar untuk Kerajaan Perpaduan meminda Akta JAC 2009 dan Perkara 122B Perlembagaan Persekutuan bagi menghentikan campur tangan eksekutif yang hanya mengikut selera politik semata-mata dalam isu pelantikan hakim, sekali gus dapat mewujudkan kebebasan sistem kehakiman serta menjunjung keluhuran perlembagaan dan kedaulatan undang-undang di dalam Malaysia sepertimana yang terkandung dalam Rukun Negara.

Sebelum ini, negara telah dikejutkan dengan pendedahan oleh mantan Tan Sri Peguam Negara di dalam buku tulisannya yang berjudul, "*My Story: Justice in Wilderness*", yang nyata bertentangan dengan laungan Kedaulatan Undang-undang atau "*Rule of Law*", oleh Kerajaan pimpinan Yang Amat Berhormat Perdana Menteri ke-7. Berdasarkan penulisan beliau, terdapat pelbagai dakwaan mengenai isu pelantikan hakim, campur tangan didalam sistem kehakiman, pendakwaan politik, serta pelbagai pendedahan yang menerbitkan seribu satu persoalan. Pendedahan daripada mantan Tan Sri Peguam Negara tersebut amat membimbangkan, menimbulkan rasa syak wasangka dan persoalan terhadap sistem keadilan, dan juga kepincangan atas doktrin, dengan izin, "*separation of power*" atau pengasingan kuasa di dalam negara kita.

Justeru, saya menyambut baik kenyataan YB Menteri di Jabatan Perdana Menteri (Undang-Undang dan Reformasi Institusi) yang menyatakan bahawa, Jemaah Menteri telah bersetuju dengan cadangan untuk menubuhkan Suruhanjaya Siasatan Diraja (RCI) untuk meneliti mengenai perkara tersebut. Namun, saya fikirkan Kerajaan tidak sepatutnya sekadar berhenti di situ sahaja. Sebaliknya perlu meminda JAC 2009 bagi merealisasikan hasrat murni Kerajaan terutamanya dalam urus tadbir yang baik atau '*good governance*'."

[Perdana Menteri]

20. PR-1521-U(27)226

Datuk Seri Ir. Dr. Wee Ka Siong [Ayer Hitam] akan mencadangkan :

"Pindaan terhadap harga maksimum telur ayam yang berkuat kuasa pada 12 Oktober 2022 di bawah Akta Kawalan Harga dan Anti Pencatutan 2011 dengan menaikkan harga kawalan telur tempatan dari RM0.41 ke RM0.50 sebiji, iaitu pada paras harga yang sama dengan harga telur import dari India. Di samping itu, Kementerian juga boleh mewujudkan "elaun telur secara *top-up*" kepada golongan B40 dengan menampung selisih harga telur sebanyak RM0.09 (RM0.41 -RM0.50) sebiji. Langkah ini boleh meringankan bebanan kewangan keluarga B40 dan turut membantu penternak tempatan mengatasi masalah kos operasi yang meningkat, sekali gus mengatasi masalah kekurangan bekalan telur ayam. Seandainya elaun telur sebanyak RM200 setahun diberikan kepada golongan B40, banyak telur yang boleh dimakan oleh keluarga B40.

Kementerian seharusnya mengutamakan penternak tempatan semasa menangani masalah kekurangan bekalan telur ayam. Ramai penternak atau pengusaha ladang ayam telur terpaksa menampung kos operasi yang tinggi mengeluarkan telur. Kos untuk menghasilkan sebiji telur ayam di ladang kini mencecah RM0.45 sebiji, di mana sebahagian besarnya membabitkan penghasilan makanan ayam. Menurut Laporan Kajian Khas Kos Pengeluaran Ayam Dan Telur oleh Jabatan Perangkaan Malaysia pada Disember 2022, purata kos pengeluaran di peringkat ladang bagi telur adalah RM0.48 sebiji pada September 2022. Penternak tempatan rugi kerana telur tempatan hanya boleh dijual dengan RM0.41 sebiji kerana ada kawalan harga, sedangkan kos menghasilkan sebiji telur telah pun melebihi paras harga tersebut. Kalau rugi, penternak tidak akan membela ayam untuk menghasilkan telur.

Malahan, telur import dari India dijual dengan RM0.50 sebiji, jika Kementerian memansuhkan kawalan harga, harga jualan telur tempatan juga lebih kurang sama iaitu kira-kira RM0.50 sebiji. Maka, cadangan untuk meminda harga kawalan telur tempatan ke RM0.50 sebiji bakal membantu rakyat dan penternak tempatan. Langkah tersebut boleh menjana ekonomi domestik dari sudut penyediaan peluang pekerjaan dan pembayaran cukai dari pihak penternak, kebersihan dan keselamatan telur ayam, kemudahan logistik, penyeliaan dan pembekalan berbanding dengan langkah mengimport telur dari India.

Justeru, Kementerian wajar mempertimbangkan cadangan pindaan kawalan harga telur supaya rakyat dan penternak tempatan tidak lagi terjejas dalam masalah kekurangan bekalan telur yang berpanjangan ini. Elaun telur kepada golongan B40 juga boleh memastikan rakyat terus berkemampuan menikmati makanan asas ini tanpa terjejas oleh kenaikan harga kawalan telur. Telur dan ayam adalah makanan asas rakyat tanpa mengira kaum atau agama, perkara ini harus dijadikan keutamaan."

[Menteri Pertanian dan Keterjaminan Makanan]

21. PR-1521-U(27)227

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan langkah-langkah Kerajaan dalam menghadapi Kemelesetan Ekonomi Global pada 2023 seperti yang diramalkan oleh pelbagai institusi kewangan dalam dan luar negara.

Menurut kajian yang dibuat oleh Bank Dunia; dalam menghadapi risiko, di mana bank-bank negara di seluruh dunia telah dan akan secara serentak menaikkan kadar faedah secara mendadak. Kesannya, seluruh dunia akan menghadapi krisis ekonomi dan bakal menuju kepada krisis kewangan yang semestinya akan memberikan impak negatif yang berpanjangan.

Pelbagai kajian dasar, pakej rangsangan dan langkah diplomatik perlu dibuat oleh Kerajaan untuk memastikan negara kita kalis krisis ini dan membolehkan rakyat hidup dalam kestabilan ekonomi yang optimum. Selain itu, krisis ekonomi secara global juga dijangka akan membawa kepada kemerosotan KDNK sebanyak 0.5 peratus pada 2023.

Pertumbuhan ekonomi mesti dipertingkatkan supaya negara kita boleh mencapai penukuhan nilai mata wang dan menarik lebih banyak pelaburan yang strategik di mana akan menyumbang kepada peluang pekerjaan, peningkatan produktiviti, pengukuhan pasaran modal dan mengurangkan kemiskinan rakyat. "

[Menteri Ekonomi]

22. PR-1521-U(27)228

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan perancangan Kerajaan untuk mewujudkan sebuah jawatankuasa khas di peringkat jemaah menteri bagi membuat kajian dan perancangan dalam membasmi kemiskinan golongan nelayan. Mengikut rekod lalu yang dibuat, bancian daripada SENDI-LKIM (2008-2017) mendapati bahawa para nelayan hanya memperoleh pendapatan melebihi RM1,200 sahaja. Meskipun Kerajaan sudah menyediakan peruntukan kepada nelayan melalui Elaun Sara Hidup Bantuan Nelayan dan Skim Subsidi Petrol, namun dengan peningkatan kos sara hidup dan keterbatasan akses kepada kemudahan yang disediakan oleh Kerajaan telah menyukarkan dan membebankan para nelayan yang berada di kawasan luar bandar. Tahun 2022, sejumlah RM7 juta diperuntukkan kepada LKIM sebagai modal pusingan pembelian ikan tempatan sebanyak 1,000 tan metrik yang akan ditempatkan di 130 bilik sejuk beku di seluruh negara untuk menghadapi musim tengkujuh. Permasalahan ini berlaku disebabkan penglibatan orang tengah yang menganiaya dan mengambil kesempatan atas usaha para

nelayan dengan memberi alasan hasil yang berkurangan disebabkan oleh cuaca buruk dan secara tidak langsung memberikan kesan negatif kepada rantai sekuriti makanan negara. Penerangan yang jelas kepada sistem penyaluran bantuan Kerajaan juga harus ditambah baik terutamanya kepada golongan-golongan yang tidak mahir menggunakan kemudahan internet dan agensi berkaitan haruslah mencari nelayan yang masih belum berdaftar agar bantuan Kerajaan juga boleh dinikmati oleh mereka. Pokoknya, Kerajaan harus meneliti dan menggali dengan lebih mendalam tentang permasalahan yang dihadapi oleh para nelayan. Kita harus memperkasakan saluran bantuan Kerajaan agar tidak berlaku ketirisan dan aktiviti penyalahgunaan kuasa yang digunakan oleh pihak-pihak tertentu. "

[Menteri Pertanian dan Keterjaminan Makanan]

23. PR-1521-U(27)229

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan sebuah pelan tindakan khas untuk menghadapi dan mengatasi krisis utiliti terutamanya tenaga elektrik dan bekalan air bersih serta apakah jangkaan kesan kepada rakyat apabila inisiatif Kerajaan mengurangkan pemberian subsidi utiliti.

Krisis tenaga elektrik berpunca dari harga bahan api sangat tinggi yang menyebabkan peningkatan mendadak kos penjanaan elektrik dan pelarasan tarif elektrik melalui mekanisme ICPT. Berdasarkan kepada kos penjanaan yang sangat tinggi ini, semua pengguna elektrik di Semenanjung Malaysia sepatutnya dikenakan surcay sebanyak 27 sen/kWj bagi tempoh 1 Januari hingga 30 Jun 2023 yang akan menyebabkan peningkatan kos sara hidup sekiranya dilepaskan kepada pengguna sepenuhnya. Sekiranya keseluruhan kos ICPT ditampung melalui subsidi, Kerajaan pula perlu menyediakan peruntukan yang sangat besar dan membebankan.

Krisis sumber air bersih diakibatkan oleh penebangan hutan secara berleluasa dan pembalakan yang tidak terkawal boleh memusnahkan "hutan awan" (*cloud forest*) yang akan mengakibatkan kehilangan sumber air yang berharga selain menyebabkan hakisan tanah dan menjejaskan kualiti sumber air. Pembuangan sampah dan sisa toksik industri juga menyumbang kepada pencemaran air sungai yang boleh menyebabkan masalah gangguan bekalan air tidak berjadual timbul dan menyukarkan rakyat dalam kehidupan seharian dan secara langsung menelan kos yang tinggi bagi meningkatkan tahap capaian bekalan air bersih, tambahan pula kerja-kerja penyelenggaraan dan penggantian peralatan secara berkala di loji rawatan air atau sistem agihan oleh operator bekalan air semestinya memerlukan perbelanjaan yang tinggi.

Oleh hal demikian jaminan tenaga dan air perlu dirangka dengan langkah yang selamat oleh Kerajaan dalam mencapai penggunaan utiliti yang mampan serta efisien dengan penggunaan kos yang rendah serta pengenaan caj tidak membebankan rakyat. Pengalaman krisis tenaga yang dilalui oleh masyarakat di Eropah perlu diambil sebagai panduan dan perkara yang perlu dirujuk dalam membuat sebarang pertimbangan pada masa kini dan hadapan."

[Menteri Sumber Asli, Alam Sekitar dan Perubahan Iklim]

24. PR-1521-U(27)230

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan menubuhkan sebuah Institut Rukun Negara bagi mengkaji dan membentangkan perancangan model literasi perpaduan jangka masa panjang menyeluruh yang akan menyelesaikan masalah polarisasi kaum yang semakin menebal dalam kalangan anak muda di negara ini. Model pendidikan jangka masa panjang ini perlu merangkumi keseluruhan aspek pembelajaran termasuk komponen subjek akademik, komponen kerohanian dan komponen etnik tanpa membelakangi peruntukkan yang terkandung dalam Perlembagaan Persekutuan dan semangat Rukun Negara. Masalah polarisasi kaum akan dilihat semakin serius jika perancangan, penekanan dan pemantauan ini tidak dilakukan segera daripada peringkat awal pembelajaran dan ia tidak dapat mencapai tahap toleransi semua kaum dan semangat kenegaraan semakin lemah dalam kalangan anak muda. Kesannya terhadap potensi untuk membangunkan negara bangsa mengikut acuan kita sendiri akan terencat dan keharmonian serta kesejahteraan negara juga akan terancam."

[Menteri Perpaduan Negara]

RISALAT-RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN</u> <u>2023</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
ST. 53	Laporan Tahunan dan Penyata Kewangan Institut Penyelidikan Keselamatan Jalan Raya Malaysia (MIROS) Bagi Tahun 2021 (Telah Diaudit)	13 Mac 2023
ST. 54	Laporan Tahunan dan Penyata Kewangan Suruhanjaya Syarikat Malaysia (SSM) Bagi Tahun 2021 (Telah Diaudit)	13 Mac 2023

****UCAPAN-UCAPAN**
(PERATURAN MESYUARAT 17)
(KAMAR KHAS)

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 13.03.2023 (Isnin)	1. YB Tuan Chow Yu Hui (Raub)	1. Pemerkasaan Mahasiswa dan Institusi Pengajian	1. YB Menteri Pendidikan Tinggi
2. 13.03.2023 (Isnin)	2. YB Tuan Chow Yu Hui (Raub)	2. Gangguan Air di Raub	2. YB Menteri Sumber Asli, Alam Sekitar Dan Perubahan Iklim
3. 13.03.2023 (Isnin)	3. YB Dato' Hajah Siti Zailah binti Mohd Yusoff (Rantau Panjang)	3. Masalah Banjir di Rantau Panjang berpunca daripada Projek Pembangunan Lembangan Sungai Bersepadu (PLSB) Sungai Golok, Kelantan	3. YB Menteri Sumber Asli, Alam Sekitar Dan Perubahan Iklim

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**